



11. september 2020

UKA 2020/64

Inatsisartut Suleriaasianni § 36 naapertorlugu apeqquaqat aallaavigalugu oqallisissiaq imaattoq matumuuna saqqummiuppara:

**Ilaqutariit nukittorsarumallugit ilaqutariinnik siunnersuisartut (coaching) pillugu apeqquaqat aallaavigalugu oqallinnissamik siunnersuut.**

(Inatsisartunut ilaasortaq Nivi Olsen Demokraatit)

Ilaqutariit tassaapput ataatsimoorfiit susassareqatigiinnerullu qitiat. Ilaquttatsinni qaninnerpaani nukissamik aallertarpugut, inuuneq artornarsivallaaraangat. Ilaquttatsinni asannineq, ikorfartoqatigiinneq isumassorneqarnerlu ulluinnarni pisarpagut. Aamma ilaquttatsinni qitornatta ilinniarpaat isumassuineq imminut akisussaaffigilernissaq inoqatinullu akisussaaqataaneq. Allatut oqaatigalugu nunatta siunissaata toqqammavissinnissaanut atatillugu inuit ataasiakkaat nukittuut pilersinnissaat pingaaruteqarpoq.

Taamaattumik pingaaruteqarluinnarpoq ilaqutariit paarilluarnissaat aamma tulaavittut toqqissisimanartutut. Taamaassaaq ilaqutariit qanoq ittulluunniit pineqaraluapata, immikkut qitornallit ilaqutariupata, suiaaqatigiit ilaqutariit pineqarpata allatulluunniit ilaqutariilersimasut pineqaraluapata.

Taamatullu oqareerluta puigussanngilarput inuttut tamatta kukkusaratta amingaateqarlutalu. Arlaannarpulluunniit kukkujuitsuunngilaq taamaattumik piffissap ingerlanerani asanerpaasagut annersissinnaasarpagut.

Ullumikkut ilaqutariinnut sullissivinnik 16-nik nunatsinni peqarpugut illoqarfinni, Qaanaami, Upernavimmi, Ilulissani, Qasigiannuani, Qeqertarsuarmi, Kangaatsiami, Aasianni, Sisimiuni, Maniitsumi, Nuummi, Paamiuni, Qaqortumi, Narsami Nanortalimmi, Tasiilami Uummannamilu. Sullivinni taakkunani ilaqutariit katsorsarneqarsinnaapput, siunnersortittoqarsinnaavoq aamma ajornartorsiortunik ikiuisoqarsinnaavoq.

Ilaqutariinnik sullissivinni ilaqutariittut ineriartortinneqartussatut akuerineqassagaanni piumasaaqatit kommunimiit kommunimut assigiinngillat.

Tunngaviusumik kommunimi tunguinnermut inunnillu isumaginninnermut sullissisup nalilikkajuttarpaa ilaqutariinnut iluaqutaassanersoq ilaqutariinnut sullissivimmi ilaqutariit sullinneqarnissaat.



Demokraatini isumaqarpugut, ilaqutariinnut sullissiveqartitsineq pitsaasuusoq, taakkunanili sullinneqakkajunnerusarput ilaqutariit inuttut ajornartorsiortut. Kissaatigaarput neqeroorutit ilaneqassasut ilaqutariit inuttut ajornartorsiuteqanngikkaluit aamma sullinneqarsinnaalersillugit aamma pisortat innersuussuteqaqqaarnissaat aqqusaaqqaanngikkaluarlugu.

Ilaqutariit avissaarnerat tarnikkut artornartorsuuvoq aamma akisoorujussuannorsinnaasarput inunnut ataasiakkaanut pisortanullu assersuutigalugu meeqqanut tapit amerlisinnaammata, meeqqerivinni akeqanngitsumik ineqartitsinerit amerlisinnaammata aamma ineqarnermut tapiissutit. Inuiaqatigiittut taamaattumik suliniutiginerusariaqarparput ilaqutariit piuinartittarnissaat aamma ilaqutariinnik nukittuunik pilersitsisarnissarput.

Allatut oqaatigalugu pisariaqanngilaq inuttut ajornartorsiuteqarnissaq ilaqutariinnik siunnersuisarnej, ilaqutariinnik ilitersuineq imaluunniit uani oqarnittuut ilaqutariinnik coaching iluaqutissarsivigerusukkaanni.

Takorloorpara, nuna tamakkerlugu ilaqutariinnik coachiisartunik peqalissasugut, ilaqutariinnik ikiusartussanik ilaqutariit aserunnginneranni. Aamma innuttaasut kikkulluunniit saaffiginnissinnaatitaassapput pinaveersaartitsinissaq pillugu, tassani ilaqutariinnik siunnersuisoqarsinnaassaaq sakkusanillu tunisisoqartarluni ajornartorsiutigilersimasat qaangernissaannut.

Eqqarsaatiginngilara ilaqutariinnut coachit angalasartuussasut. Paarlattuanik eqqarsaatigaara ilaqutariinnut coachit illoqarfinni nunaqarfinnilu najugaqartuussasut sulillutillu. Soorunami ilinniarsimasuussapput malittaaniillu pikkorissarsimassallutik, kisianni illoqarfimminni nunaqarfimminniluunniit najugaqartuussapput. Kullorsuaq assersuutigisigu. Imaassanngilaq ilaqutariinnut coachi Sisimiuniissasoq Kullorsuarmut tummanngisaannarsimasoq. Naagga, ilaqutariinnut coachi illoqarfimmut nunaqarfimmulluunniit sullivissaminut attuumassuteqassaaq.

Ilaqutariinnut coachit najukkaminni saqqumilaartuussapput, toqqissisimanartooqqullugu saaffiginninnissaq. Tassa ilaqutariinnut coachi ilaqutariinnit pissarsiariuminartuussaaq aamma siunertani annerpaassaaq ilaqutariit ajornartorsiutaannut tunngatillugu siunnersuisoqartarnissaa coachiisoqartarnissaalu, inuiaqatigiit toqqammavissaqartikkumallugit ilaqutariinnik nukittuunik aamma ataqatigiilluartunik. Tamatumani siunertaralugu ilaqutariit ajornartorsiutiminnik iluarsisarnissaat najuinnartarnissaallu ilaqutariinnut inuiaqatigiinnullu nuannaarutaasumik.

Coaching ingerlanneqartassaaq ilaqutariit namminneq angerlarsimaffiini.

Takorloorpara aqqissuussineq Namminersorlutik Oqartussat ataaniissasoq, pineqarmat nuna tamakkerlugu suliniutissaq. Misilittagaqalerumalluni immaqqa aallarniutigalugu ukiumi ataatsimi misiliutigalugu ingerlatsisoqarsinnaavoq, sumiiffinni assigiinngitsuni pingasuni ilaqutariinnut



coachiliigallarnikkut; illoqarfimmi angisuumi, illoqarfimmi minnerumaami kiisalu  
nunaqarfimmi. Taamaasilluta aqqissuussineq aningaasaqarnerlu pillugit naleqarluartunik  
paasissutissani pissarsisinnaassagaluarpugut.

Qilanaarpunga partiit allat Naalackersuisullu uunga isumassarsiamut isumaasa tusarnissaannut.